

Vun driweriwer

erscheint auf www.lenauheim.de

monatliche
Erscheinung

September 2021

von Helen Alba

Mit der Tier ins Haus falle

Nit trucke hinner de Ohre

De 15jährichi Franzi kummt so geher Owet zum Vetter Sepp, der wu grad im Gang sitzt un sei Pheif rache tut. „Vetter Sepp, ich will desjohr bei der Kerwei de Vorstrauß letzetiere un eier Rita zur Vortänzerin mache“! „Nor mit der Ruh, mei Knecht. Gutnowet, gell des hascht in der Eil vergess“! De Franzi, der sowieso gang ufgeregt war, werd feierrot im Gsicht un saat druf „Griess Gott“! De Vetter Sepp zieht gemächlich an seiner Pheif un fangt zu rede an: „Horch mol Franzi, hascht du derdriwert schon mitm Rita gered? Ihr seid mitnaner in die Obeda gang, hat acht Johr die Schulbank gedrickt un seid doch grad erscht ausgeblieb. Vun mir aus kennt der schon mitnaner um die Kerwei gehn. Doch gleich Vorstrauß letzetiere? Dermit sin ich nit inverstan. Weil e Vortänzer, der muss schon bissl älter sin, der muss es Militär gemacht han un denkt ans Heirate. Doch du bischt noch nit ganz trucke hinner de Ohre“!

De Franzi schaut ganz verstawwert un kann nor noch stottere: „Es Rita hat nor Aue for de Johann, mir tut's sogar auswaiche. Was soll ich nor mache, dass es mich in owacht holt? Ich han gedenkt, wann ich's zur Vortänzerin mach, dann rick ich in de Vordergrund“. „Du bischt jo direkt mit der Tier ins Haus gfall. Doch mei Rot is: abwarte. Bei eem so junge Mädli, wie's Rita is, kann mer nix mit Gewalt erzwingen. Ihr zwaa seid doch gut Kumrad mitnaner. Am bescht, ihr bleibt des ach weiterhin. Es misse noch phaar Johr vergehn, bis ihr wisst, wer wem gfall tut. Verhall dich em Rita gegeniwer wie bisher, ansunste git des Mädli sturrich. Ach ich war mol jung. Die Erfahrung kummt erscht mit de Johre“.

„Nix for ungut, Vetter Sepp. Ich wer awer trotz allem es Rita anrede, for mit mir um die Kerwei gehn“. „Mach des mei Bu, do dermit sin ich inverstan!“

Nimi auskumm mitnaner

„Mutter, Vater, ich loss mich scheide“, so stermt es Hilde in aller Herrgotsfriehe ins Elternhaus un fangt gottsjämmerlich zu kreische an. „Fall doch nit so mit der Tier ins Haus, du jaascht uns jo e Schreck in. Un verzähl mol scheen der Reih noh. Was is passiert“? froot de Mutter. Un de Vater beidelt nor mitm Kopp un saat: „Des geht nit! Erschter hascht Rutz un Wasser gebrillt, dass du als blutjunges Ding heirate derfscht. Un noh eem halwe Johr kummscht mit so eem Bleedsinn derher“? „Pheder, loss des Kind in Ruh ausrede. Es kummt nit umsunscht hergerennt. Es soll sei Herz ausschitte“!

„Ich men, er hat mich nimi gheere, de Roland. Er is oft korz angebunn, schmaichelt mich nimi so oft wie frieher. Un ans Schwarzi Meer will er ach nit mit mer fahre. Doch des is noch gar nit alles! Ich men, er hat e Minsch. Anstatt gleich noh seim Dienscht hem zu kumme, verspät er manchmol sogar e Stund un es Esse werd kalt. Un dann fange mer zu zänkren an un er geht wieder fort – sogar e halwi Stund bleibt er weg! Des is ke Khertsich! Des hal ich nimi aus“!

„Hilde, jetz horch mer mol gut zu“, druf die Mutter. „In jeder Eh git's Unstimmichkeite. Mer muss sich zammraafe. Un immer nohgin. Ihr seid doch jung verheirat, misst eich noch an villes gewehne. Geh hemm, koch was Gutes, zieh dich scheen an. Un wann de Roland kummt, froo nit gleich, for was er sich verspät hat. Gib em liewer e Bussl un saa em, dass du ne mit Sehnsucht erwart hascht. Fang ke Streit an, vertraat eich, es werd sich schon alles inrenke. Un jetz mach e frohes Gsicht un merk der, mei Kind: Es Weib muss nit immer recht han. Mer muss nor wisse lerne, wie mer mit seim Mann umzugehn hat“!

De Vater verzieht nor es Maul un denkt sich seins derbei!